



**ATASSUT**

**UPA15/90-1**

**Siverth K. Heilmann**

**17.03.2015.**

**Uunga siunnersuut: Nunami sumiiffinni immikkut toqqakkani takornariartitsinermik inuussutissarsiornissamut akuersissuteqartarneq pillugu inatsisartut inatsisaata nr. 19, 3. december 2012-imeersup allangortinneqarnissaa pillugu Inatsisartut inatsisaat nr. xx, xx. Xxxx-imeersoq.**

(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Nunami sumiiffinni immikkut toqqakkani takornariartitsinermi inuussutissarsiornissamut akuersissuteqartarneq pillugu Naalakkersuisut naleqqussaaniarnerat ATASSUT-miit ilassilluarparput.

Inuussutissarsiutinut nutaanut pioreersunullu qinnuteqartitsisarnernut aqutissat amerlavallaartarnerujussuisa naleqqussarneqartariaqarnerat ATASSUT-miit matu ataasiinnaanerusoq atorneqarnerulertariaqartoq kissaatitoqaraarput, taamaattumillu Naalakkersuisut marloqiusamik akuersissutinik peqartoqannginnissaanik anguniagaqarnerat ATASSUT-miit isumaqatigaarput.

ATASSUT-miit pingaarteqaarput, nunatsinni takornariartitsinerup naleqqussaasoqartuarnissaa, kalaaleqateqarpugummi tupinnaannartumik sanalunermik pikkorissorpassuaqarmat aamma takornarissanut aningaasarsiutugalugillu tunisassiarisinnaasaasa massakkornit suli pitsaanerusumik aqutissiuunnissaat.

Inoqarpoq ilaqutariit kinguariinnik eqaloqarfinnik peqqissaarussilluinnarnermikkut ukiorpassuarni pingaartumik kuuit tatsillu eqaloqarfiusunik paarsilluarnermikkut, kinguariinnut maligassiuinermikkut suli eqaluit piujuaannartinneqarnissaanut pingaartilluinnartunik. Tassami eqaloqarfiit mianerilluinnarneqarnissaanik perorsarneqarsimanerup kingunerisaanik, ilaqutariippassuaqalernikuuvoq peqassuseq mianeralugu manna tikillugu eqaloqartitsisunik.



Taamaattumik kissaatiginaqaaq ileqqutoqqanik ingerlatsisut illersorneqarnerat annerpaatinniarlugu nalinginnaq ingerlasoqalinnginnissaa.

Kommuunit kattussuunneri sioqqullugilli takornarissanut sunngiffimmilu aalisartartunut piffinni arlalinni eqalunniarfiusinnaasunik akuersissuteqartarnerit pisortaniik innuttaasunillu akuerisaasunik periarfissaqartitsilluartunillu peqareerpugut. ATASSUT-miit pingaartissavarput takornarissanut kuunni eqalunniartitsisarnerit unnuiffiusinnaasunillu illuaraateqareersunut imminnut akornusersuuttoortoqalersinnaanera mianerineqassasoq.

Takornarissanut eqalunniartitsinissaq kisiat siunertarinagu, nunatsinni pisuussutit uumassusillit atorluarnissaanut illoqarfitta nunaqarfisattalu immaqalu eqqatsinni illuqarfippassuaqalernikummat eqaralaarsuini neqerooruteqarnissamut aningaasarsiutiginnissaanullu periarfissarpassuaqarpugut. Tamakkuusinnaassapput aamma piffinni assigiinngitsuni ilisimasat takornarissanut neqeroorutiginnissaannut nalunaarsorneqalersinnaanerinullu aqquataasinnaasutut ATASSUT-miit isigisagut.

Qulaani eqqartukkatta saniatigut ilisimavarput, illoqarfinni nunaqarfinnilu innuttaaqateqartaratta, pinngortitarsuup alianaatsup uumasuisalu takunissaannut angallateqannginnertik pissutigalugu takuerusuttarnermikkut namminersortunut takornarialerisartunullu aningaasarsiorniarnannut ilapittuutaasartut ilagiinnarpaat sulilu aqqutissiuussinerput eqaallisartuassallugu ATASSUT-miit peqa-taassaagut.

ATASSUT-miit qulaani saqqummiussagut innersuullugit kiisalu tusarniaanermi uparuaatigineqartut ilanngullugit nalilersorluarneqarnissaat inassutigissavarput. Taamatut oqaaseqarluta ATASSUT-miit aalajangiiffigisassatut siunnersuutip aappassaaneerneqannginnerani ataatsimiititaliami susassaqartumi suliarineqaqqaarnissaa innersuussutigaarput.